



## Kotstrandarkirkjugarður. Rekstur og framkvæmdir 2009-2010

Af atburðum liðnum síðan á ársfundi kirkjugarðsnefndarinnar 2009, ber efst þegar Eyrún Rannveig Þorláksdóttir kirkjuvörður, þann 21. apríl, tók fyrstu skóflustunguna að nýja garðinum, við stutta athöfn í garðinum, og hafist var handa um stækkun kirkjugarðs Kotstrandarkirkju, á um eins hektara landi, sem keypt var til þeirra nota árið 1997.

Fríða Björg Eðvarðsdóttir landslagsarkitekt, granni á Mæri, vann að hönnun nýja kirkjugarðsins og Sigurður Þ Jakobsson tæknifræðingur í Hveragerði vann verklýsingu eftir þeim teikningum, Sigurður vann einnig kostnaðaráætlun, ýmsar tækniteikningar og annaðist verkeftirlit.



Gerð var verðkönnun meðal jarðvinnuverktaka hér í héraði. Eftir að verðkönnun lá fyrir, en 5 tilboð bárust í verkið, öll undir kostnaðaráætlun, var samið við lægstbjóðanda, sem var Ræktunarmiðstöð Jóhanns Ísleifssonar í Hveragerði. Strax og verksamningur lá fyrir ásamt framkvæmdaleyfum sveitarfélaganna var hafist handa og unnið allan tímann í samræmi við verk- og áfangaáætlun kirkjugarðsnefndarinnar um verkið; Ýtt, grafið og mótað landið, samtals um 10 þúsund rúmmetrar á um einum hektara, vegir og stígar eru um 2,600 fermetrar, lagðir voru um 300 metrar af fráveitulögnum og aðrir 300 metrar í nýrri vatnsveitu og margt fleira gert. Í fyrstu sóttist verkið seint vegna rigninga, en brátt fór sólin að skína og framundan var einstæð veðurblíða um sumarið og allan verktímann og lauk umsömdu verki á áætlun fljótt og vel þann 15.júlí. Allar plöntur komu stórar og hraustar frá Ólafi í Náthaga, útplöntunina önnuðust að mestu landslagsarkitektinn og granninn Fríða Björg og undirritaður, svo kom á mig að vökva, reyndist það ærinn starfi í þeim miklu þurrkum, sem voru það sumar, erfitt með vatn þar til nýja vatnsveitan kom.

Hafðist það allt um síðir og engin þeirra dó eins og sagt er, þ.e. plönturnar ágætu úr Náthaga höfðu það af og þrifust vel og komu allar nema ein lifandi undan vetri. Þó er plöntun ekki að öllu lokið, lítilsháttar hefur verið plantað í sumar og enn stendur til að planta í haust og klára það verk síðan næsta vor, 2011. Auk þess, að á því svæði, sem ekki nýtist fyrir grafarsvæði, efst í garðinum, þar sem í ljós kom

svolítið grjótholt, verði gerður lítill biblíulegur grasgarður, settur kannski upp þar einnig bekkur og flaggstöng.



Að tillögu séra Jóns Ragnarssonar var minnisvarði gerður vegna 100 ára ártíðar kirkjugarðsins og vökumanns hins nýja kirkjugarðs, sem var jarðsettur þar þann 16. október árið 1909, fyrir hundrað árum, en hann var Kjartan Ólafsson Tómasson fæddur: 4. nóvember 1908 dáinn: 25. september 1909. Svo bar við 100 árum síðar, sama dag 2009 að jarðsett var í fyrsta skipti í “nýja garðinn” eða vestur garðinn.

Eftirfarandi vers, eftir skáldið góða Séra Hallgrím Pétursson, er nú skráð á minningarsteininn;

Vak þú, minn Jesú, vak í mér,  
vaka láttu mig eins í þér,  
sálin vaki þá sofnar líf,  
sé hún ætíð í þinni hlíf.

Hönnun og umsjón með gerð minnisvarðans höfðu Þór Sigmundsson steinsmiður og Guðni Tómasson.

Öllum, sem að verkinu komu voru færðar þakkir frá kirkjugarðsnefndinni á vígsluathöfninni í Kotstrandarkirkju 18. október 2009 á 100 ára ártíð kirkjunnar og garðsins; Áður hef ég nefnt Fríðu Björgu landslagsarkitekt, Sigurð tæknifræðing, verktakann Jóhann Ísleifsson og einnig vil ég nefna og þakka bílstjórum, véla- og verkmönnunum, sem unnu verkið, þeim Baldri Sigurðssyni, Guðmundi B Jóhannssyni, Reyni Guðmundssyni, Gunnari Sigurðssyni, Ingólfi Einarssyni, Ara Michelssen, Brynjólfi D Halldórssyni og Björgvin Ásgeirssyni starfsmönnum Ræktunarmiðstöðvarinnar.

Margvíslegar umbætur aðrar hafa nú einnig verið gerðar á eldri kirkjugarðinum, bæði 2009 og 2010; lagður nýr rafstrengur og lýsing verið bætt, einnig vatnslagnir og vökvunarkrönum fjölgað auk annarra viðhaldsverka undir stjórn Þorsteins Hannibalssonar umsjónarmanni kirkjugarðsins, færi ég honum þakkir fyrir gott samstarf.

Í kirkjugarðsnefnd Kotstrandar kirkjugarðs eru;

Eyrún Rannveig Þorláksdóttir  
Hulda Hjaltadóttir  
Egill Gústafsson  
Þorsteinn Hannibalsson  
Birgir Þórðarson  
BÞ/30.08.2010

